

Polue Epesesi xosaniki xayawotai nakau **Akereki kuna**

Mua nakaupo nanunanu xotapa paiya muanumu Xoiteue xokupa sapi Kristusu xosa kununuwopurexina, paiya mena xouropu xokupa sapi xeika ouropu xeika kununuwatia, Kristusue xokupa sapi xiri tapaxi puropina. (1.10) Xoiteue nukou xuiapuni sainikerepurexina, kakatia ninie Kristusu xeika xiri etokineria kirenini xonikikemu puropineri.

Akereki kuna masa paiya Xoiteupo xousua xeika xouwesikepi kapia xeikae kakati xokupa xuiapue Kristusue xonikisuwoteneae xirini kununeneri kireni xuiapu kini sayeteneaire Polue xokupa kuna kunawotai. Yesusupo saina paie Xoiteue xuiapu xiyeri tinikina Xoiteupo Supo Youya tiniketai. Nukoe sokisoki kuna kunawoyai siena paiya nukoe xokupa asinaku kapia nini xosa kakepine xeyai. (1.14) Xoka axiri nakaupo kuna masa xosa Polue ipaki kunauna Yesusue xonikisuwoteneae Kristusu xeika etokineri, pa xati ninie xiri kireni xonikikemu xineri Xoiteupo kapiani kutu taiwopineri.

Mua nakau xosa paiya xuiapu nini Kristusu xeika etokineri kireni xuiapu kini xineri xina yarani atarinikepure Polue kunaourouna. Nue ipaki kunauna Xoiteupo xuimiapimi paiya nini kireni mupuniki xati Kristusue pa mupunikipo tapakemu sie xetai. (4.1-16) Pa xeika Xoiteupo

xuimiapimi paiya nini kire ata sie xati Kristusu nukoe atapu akereki xai xetai. (2.19-22) Xoiteupo xuimiapimi paiya nini kire xui sie xati Kristusue pa xui po xamu sie xetai. (5.22-32) Mua nakau xosa paiya asinaku asinaku kapia Xoiteue nukou xuiapu xosa kakepure xetai xosa sikoe atinukuni kutu xekeurounuku.

Kristusu xosa Xoiteue sini oma xuiapu saisiketai

1—3

¹ Ye Polu, ye Kristusu Yesusupo tianuwopi. Nukoe ye xouweyati Xoiteue ye Yesusupo tianuwopi tumuyeretai. Tini Xoiteupo xuiapue Epesesi erewese purinuku Kristusu Yesusu taiwopi menamenaukiriai xosa mua nakau xayaritikine.

² Sikou Emisiki Xoiteu xeika Kokaipa Yesusu Kristusu xeikae, tini xonikietikineri xonikikemu tikeria tinipo xotikikemu yoroara puropina.

Xoiteue Kristusu xosa xokupa mena xouropu asinaku sapi siketai

³ Sini Xoiteupo wenumu xourorepu, nu sikou Kokaipa Yesusu Kristusupo Omo xeika nukou Xoiteu xeika. Sikou xenisiki tianuwopure, nukoe Yesusu wenumurei mena xouropu xokupa asinaku sapi siketai.

⁴ Sini xeseu puropure Xoiteue ou iyarepu xuweu yauseni, sini Kristusu xeika etokepure

1:1 1.1 YT 18.19-21; 19.1; Ro 1.1; 1.7; 1 Ko 1.1; Kl 1.1 **1:2 1.2** 2 Ko 1.2; Ka 1.3; Kl 1.2; Ta 1.4 **1:3 1.3** Ep 2.6 **1:4 1.4** Yo 15.16; 17.24; Ro 8.28; Ep 5.27; Kl 1.22; 2 Ts 2.13; 2 Ti 1.9; Ye 2.5; 1 Pi 2.20

tumusikeretai. Kakeki xati sini nukou ekero kutu asinaku xu xuweu xuiapu puropu.

⁵ Yesusu Kristusue saina tina siko xiyeri tisikepinaure, ekimeni kutu nukoe xouwesikina nukou nononi kutu sayepure tumusikeretai. Xoiteue nukou nanunanuni nimaririeina taina panumu kaketai.

⁶ Nukoe pa Nono xiri xouwewotai wenumurei, Xoiteue xiri xouwesikina xoukemu sikeyai. Pa xati nue ere xouwesikina xoukemu siketaire nanunuku Xoiteupo wenumu xourorepu.

⁷ Xoiteue xouwesikina xoukemu sikepu kapia xiri xokopexina. Pa xati Kristusue sini xiyeri isayasikepure xumotai xati, nupo yawie sikou xokupa xunu Xoiteue xesauwetai.

⁸ Xoiteue xouwesikina xoukemu siketai kapia siko xosa panipani kusauna, xokupa xetaxetau sipa xeika asinaku nanunanu xeika siketai.

⁹ Ekime Xoiteue Kristusupo saina xosa mua kapia kakepure nanunanuwoyai. Pana nupo pa nanunanu paiya ximiaki puriyai xati ximine nupo nanunanu itou atarisikina.

¹⁰ Pa sapi kakepure xetaia muanumu. Xokupa sapi taitai xouna xouna, pa yause iyaretai xosa paiya, xokupa sapi mena xouropu xeika ouropu xeika rania Kristusu xosa kununuwopina. Kaka-tia Kristusue xokupa sapi tapaxi puropina.

¹¹ Xoiteu nukou xouweni nukou nanunanu

1:5 1.5 Yo 1.12;Ro 8.29-30;2 Ko 6.18;Ka 4.5 **1:6 1.6** Mt 3.17;Yo 3.35;Ro 3.24; 5.15;Kl 1.13 **1:7 1.7** YT 20.28;Ep 2.7;Kl 1.14; 1.20;Ip 9.12;1 Pi 1.18-19 **1:9 1.9** Ro 16.25;Ep 3.4; 3.9-11;Kl 1.26;2 Ti 1.9
1:10 1.10 1 Ko 3.22-23;Ka 4.4;Pl 2.9-10;Kl 1.16; 1.20;Ip 1.2;1 Pi 1.20
1:11 1.11 Ro 8.17; 8.28-29;Kl 1.12;Ta 3.7;Ye 2.5;1 Pi 1.4

taina xokupa sapi kakati marouna, kakina ekime nukou xouweni apimi Kristusu xeika etokinuku nupo xuiapu sayepinukure tumusikereyai.

¹² Sinie akerinuku Kristusure xosikisunuku taikiri, nukou kokaipa memeremu xeika sokisoki xeika xosa sipesi nanunuku nukou wenumu xourorepinukure sini Xoiteue tumusikeretai.

¹³ Tini xetau xuiapu kini tinie rania suau kuna iyesieikiriai, paiya pa Xoiteupo asinaku kunae tini xiyeri titiketai. Kakati Kristusure xotikisunuku. Tinie nukou xuiapu kinini kutu purinuku, Kristusu xeika etokari, ekime Xoiteue sokisoki kuna kunawoyai taina Xoiteupo Supo Youya tiketai.

¹⁴ Sini Xoiteupo Supo Youya tieikiriai, pa xati siko sipa, Xoiteue kireu asinaku sapi nukou xokupa xuiapu tinikepure sokisoki kuna kuna-woyai sie xurise sini rania tepu. Xoiteue xiyeri tisikati nuko xeika somoni kutu puropu yause xosa pa sapi tepure yakunuku. Kakinuku pa sokisoki saina tixanauwoyaire nanunuku nukou kokaipa wenumu xourorepu.

Xoiteue Epesesi sipa tinikepinaure Polue kunikuniwotai

¹⁵ Tinie Kokaipa Yesusure xotikisunuku Xoiteupo xokupa xuimiapimi xosa xotikikemu tinikirounuku kuna ye iyesitiai.

¹⁶ Pa xati ye kunikuninepa, sipesi tinire nanunanune Xoiteu eiyaseuroune. Kakine

1:13 1.13 2 Ko 1.22; 6.7; Ep 4.30; Kl 1.4-6 **1:14 1.14** Lu 21.28; Ro 8.23; 2 Ko 1.22; 1 Pi 2.9 **1:15 1.15** Kl 1.4 **1:16 1.16** Pl 1.2-4; Kl 1.3; 1 Ts 1.2

¹⁷ ye Xoiteu kotoutiai, nu Kokaipa Yesusu Kristusupo Xoiteu, nu kokaipa memeremu xeika sokisoki xeika nikau Eminiki. Nue asinaku nanunanu tikatia tinie nukou kuna xotapani kutu sipawari, nukoini kakatia, tini nupo xiri sipawakuai.

¹⁸ Nue tinipo nanunanu xosa memeremu tikepinaure xoiyeune, kakatia tini takuai sapire yaitikatia atinari sipawakuai xine, paiya tinie yaku purikiriai sapire kunaune. Kakinaria Xoiteue sini nukou xuiapu xosa asinaku asinaku sapi iyarerisiketai sipawakuai.

¹⁹ Kakinari ipaki sipaunaria, mua Xoiteupo sokisokie sini nure sipesi xosikisuwopi saina tikiriai xuiapu xosa pani kokaipa saina tina xakuai. Sini nupo sokisoki uteiwopu xana xuweni kutu. Pa Xoiteupo kokaipa sokisoki sini xosa saina tirouna,

²⁰ paie sore ekime Kristusu xosa saina tetai. Kristusue xumurati, pa Xoiteupo kokaipa sokisokie sarina mena xouro sou xouna nukou xupo meruira miseretai.

²¹ Pa xati Kristusue xokupa xetau xetau yaniyani xouroni kutu puroto, xokupa tumu teu xouro puroto, xokupa kapmani xouro puroto, xokupa sapi sokisoki tuku teu xouro puroutouna. Nue xokupa apimi mua yause xosa weniniki tuku xeika sewai yausepu xeika tuku xouro purina.

²² Xoiteue xokupa sapi Kristusu turo iyarina

1:17 1.17 Kl 1.9 **1:18 1.18** YT 26.18; Ep 2.12; 4.4; Kl 1.12 **1:19**
1.19 Ep 3.7; Kl 1.11; 1.29; 2.12 **1:20 1.20** Siri 110.1; 2 Ko 13.4; Kl
 1.16; 2.10-12; 3.1; Ip 1.3 **1:21 1.21** Ro 8.38; Pl 2.9-10; Kl 2.10; 2.15; Ip
 1.4 **1:22 1.22** Siri 8.6; Mt 28.18; Kl 1.18; Ip 2.7 **1:22 1.22-23** Kl
 1.18

kawati, nue xokupa sapi tapaxi purati, pa kapi-arei nu Yesusure xonikisuwoteneai nikau tumu purina.

²³ Kristusure xonikisuwoteneai apimi paiya nini Kristusupo mupokemu. Kristusue xokupa sapi minika purina xiri xokopexina, nue Yesusure xonikisuwoteneai apimi xosa xokope xetai.

2

Xoiteue kakati sini xumuweikiriai apimie Kristusu xeika ekisikioma purinuku

¹ Tinie ekime xonuxonu xonuxonu xunu erari paie outikiati xumurunuku.

² Pa yause xosa tinie mua ouropu kapia xoxi xosa texikiniai. Kakinuku mena xouro puroteneai xoxi yaniyani nikau tumupo kapia tinie taikiniai, paiya pa sokisoki yaniyanie Xoiteupo kuna sokau porourouneri xuiapimi nikau kamunikiro xemu saina tina.

³ Ekime siko xokupae pa apimi kini xeika purinuku, sikou xipiki xosikie xouweourouna xoxi kapia kireni sini taikiriai. Sini pa xipiki xosikie xouweourouna kapia kireni tainuku sikou nanunanue xouwewotai kapia taiwotoukiriai. Sini panumu kaki purikiriai yause xosa panumu xoxi kapia xokupa xuiapue kakeri Xoiteue xoxi yause tinikepure ireyetai sini tiku.

1:23 1.23 Ro 12.5;Ep 4.10; 4.15;Kl 2.9; 3.11 **2:1 2.1** Ep 4.18;Kl 1.21 **2:1 2.1-5** Kl 2.13 **2:2 2.2** Yo 12.31;Ep 5.6; 6.12;Kl 1.21; 3.6-7;Ta 3.3 **2:3 2.3** Ro 5.12;Ka 5.16;Kl 3.6;Ta 3.3;1 Pi 4.3

⁴⁻⁵ Suau, sikou xoxi kapiae sini ousikiati xumuweikiriai. Sini xiri xumuweteneai apimi sie purinuku. Pana Xoiteue sini xouwesikina xoukemu siketai kapiae xiri koxetai. Nukoe kakati sini Kristusue xeika ekisikioma purinuku. Iyo, Xoiteue sini xouwesikina xoukemu siketai kapia kiren timeri xiyeri titiketai.

⁶ Nue Kristusue Yesusu xeika siko saisikeretai. Nue mena xouro nukou kokemu sai xosa Kristusue xeika miseisikeretai.

⁷ Kristusue Yesusupo saina paie kakati nue mua asinaku kapia siko xosa kaketai, pa amure, xurise xokupa yause xosa xokupa apimi nukoe xiri xouwenikina xoukemu tiniketai kapia atarinikepurexina.

⁸ Tinie Kristusue xotikisuxari, Xoiteue tini xouwetikina xoukemu tiketai kapia kiren timeri, Xoiteue tini xiyeri titiketai. Paiya tini takieni kakikiriai sapixe. Xuwe. Xoiteue tini aini tiketai.

⁹ Paiya tini saina tinuku xe tikiriai sie xuwe. Pa xati kire apue nukou wenumuni xouropuwatixe.

¹⁰ Kristusue Yesusue kakati Xoiteue sini oma xuimiapimi saisikeretai, paiya siko asinaku kapiapu imerei texepure ekimeni Xoiteue ireiyerisikexai ime.

Kristusue xiwai kapia xuweiyati aimore kinie kireni tutuxineri

2:4-5 2.4-5 Lu 15.24; 15.32; Yt 15.11; Ro 5.6-10; 6.4-5; 6.13; 10.12; Ep 1.7; 2.1; 2.7; Kl 2.12-13 **2:6 2.6** Ep 1.20; Kl 2.12 **2:7 2.7** Ep 1.7
2:8 2.8 Yo 4.10; Ro 4.16; 10.14-17; Pl 1.29; 2 Ti 1.9; Ip 6.4 **2:9 2.9**
 Ro 3.20; 3.27; 4.2; 1 Ko 1.29-31; 2 Ti 1.9 **2:10 2.10** 1 Ko 3.9; 2 Ko 5.5; 5.17; Ep 4.24; Ta 2.14

¹¹ Tini sipa, Yuta apimie apimi nikau mupuniki ipisa kakirounerie, tini ipaki kakikirouneri, “Nini mupuniki ipisa katiwopu xuweu apimi,” xirouneri. Paiya apimie nikou mupuniki masareni mamarikaurounerire kunawotai. Paina tini atinari nanuwa, ekime tini xetau xeteneai xuiapu purinuku,

¹² pa yause xosa Kristusu nutiemu puropu xuwe. Tini Israili kini xeika puropu xuwana kisau purikiniai. Xoiteue Israili xeika sokisoki kuna kunarina nini xeika kuna ouna xoniki tumareyaina tini paiya nini xeika purarixe. Tini mua ouro purinuku, sewai kire asinaku sapi purotai putawopina tini yakuwarixe. Pa xeika tini Xoiteu sipa xuwe.

¹³ Ekime tini xetauroni kutu purikiniai. Pana muaiya Kristusupo yawie sotiki koati, Xoiteu nuko nutiemuni kutu purinuku.

¹⁴ Kristusu nukoini kakirouwati sini xosikikururei xirini ati misinuku. Ekime Yuta kinie xetau xeteneai apimi xeika xiwaixirouneri, kakeri pa xiwai kapia paie sepuri sie Yuta kini xeika xetau xeteneai apimi kini xeika purotai. Pana Kristusu nukou mupoini pa sepuri kereuweina pa xiwai kapia xuweiyeina, pa aimore kini kunununikerina kireni kini nikeretai.

¹⁵ Nue Mosesipo tuxotapa xeika xokupa kuna masa xeika nupo kireu xetau tuxotapa xeika xesauwetai. Nue aimore kini kunununikerina,

2:11 2.11 Ro 2.28-29;1 Ko 12.2;Ep 5.8;Kl 1.21 **2:12 2.12** Ro 9.4; 9.8;Ka 4.8;Ep 4.18;Kl 1.21;1 Ts 4.5; 4.13 **2:13 2.13** Ka 3.28;Ep 2.17;Kl 1.20 **2:14 2.14** Ais 9.6;Mai 5.5;Yo 16.33;YT 10.36;1 Ko 12.13;Kl 1.20; 2.14 **2:15 2.15** 2 Ko 5.17;Ka 6.15;Ep 4.24;Kl 1.20-22; 2.14; 2.20

kireni apu sieinikerepure pa kapia kaketai. Nue pa kapia kaketai xati sini xosiki tumaxi purinuku.

¹⁶ Kireni mupoe pa aimore kinie Xoiteu xeika xoniki tumaxi puropinerire na nikitoto xosa xumotai. Kakina ekime puroyai xiwai kapia na nikitoto xosa xumuwetai.

¹⁷ Nue kouna asinaku kuna ipaki uteina, “Tini ximine xotikikemu kirenini pura,” xetai. Nue mua asinaku kuna tini xetauro wese purix-anaukiriai apimi kini xosa uteiwotowotai, to-muroni puroteneai xuiapu xosa rania uteiwotai.

¹⁸ Xoiteue wesikitati nukou xosa xouwopure, Kristusue panumu kakati Xoiteupo Youyae sini aimore tutuni tianisiketai.

Sini Yesusu taikiriai sini Xoiteupo atani kutu

¹⁹ Muaia tini ou xuweu kamariorio puroteneai apimi siexe. Xuwe. Tini Xoiteupo xuiapu tuku kireni kinipu purinuku. Tini Xoiteupo xuiapuni kutu purinuku.

²⁰ Tini Xoiteue xuwotai ata sie. Mua atapu xai sie nue sini Yesusupo tianutianuwopi xeika kunatureture xeika waisikereyai. Yesusu Kristusu nuko paiya akereki xaini kutu.

²¹ Mua atapu xokupa arawae Kristusu xosa wawaiwoki, kakineri xokupani atineri wawai-woteneai. Xoiteue pani pa ata xuwati, Xoiteu nukou atani puropinaure pa ata xiri kokaipa xepurexina.

2:16 2.16 Sek 9.10;Ro 6.6; 8.3;Kl 1.20; 2.14 **2:17 2.17** Ais 57.19;Sek 9.10;YT 2.39;Ro 5.1 **2:18 2.18** Ro 5.2;1 Ko 12.13;Ep 3.12;Ip 4.16;1 Pi 3.18 **2:19 2.19** Ka 6.10;Ep 3.6;Pl 3.20;Ip 12.22-23
2:20 2.20 Mt 16.18;1 Ko 3.9-11;Ka 2.9;XKY 21.14 **2:21 2.21** 1 Ko 3.16-17;2 Ko 6.16;Ep 4.15-16;Kl 2.19

²² Tini rania Kristusu xosa wawaiwari, Xoiteue nukou kireu xuiapu xeika kununuwati, tini Xoitupo atani kutu xatia, nuko xeika Xoiteupo Supo Youya xekae pa atoro puropineri.

3

Polue xetau xeteneai apimi xosa asinaku kuna uteiwopina saina tuku

¹ Xoiteue tini xiri asinakuni kutu saitiketaiti xati, pa xotapaure sore ye Polu ye kakauya xosa purine pa amure, tini xetau xeteneai xuiapu tianitikepure Kristusu Yesusupo saina tiroune.

² Tini xosa rania pa saina kakina xouwetikina xoukemu tiketai sie, yei pa saina tepineure Xoiteue ye xouweina xoukemu sierina tumuyeretaitaire, tini iyelikiriaixi nanune.

³ Mua kuna Xoiteue ekime kakeyai kapiaure paiya ximiaki puroyaina pana, Xoiteu nukoini ye xosa yarareyai paiya, ye xayaka xayaka kunauweitiai.

⁴ Kristusue ximiarei pa saina tetaire kuna ye xiri sipani kutuna, tinie mua kuna ninaxinaria tini panumu sipawakuai.

⁵ Ekime xokupa yause xosa, Xoiteue mua ximiaropu kuna atina uteiwopu xuwe. Pana muaia Xoiteupo Supo Youya xosa, Xoiteue sini Yesusupo tianuwopi xeika Xoiteupo kunatureture xeika xosa atina kuna uteiwotai.

⁶ Mua kuna paiya muanumu. Asinaku kuna xosa paie tini xetau xeteneaiapo apimi

2:22 2.22 1 Pi 2.5 **3:1 3.1** Ep 4.1;Pl 1.7; 1.13;Pm 1; 9 **3:2 3.2**
 Kl 1.25 **3:3 3.3** Ep 1.9-10;Kl 1.26 **3:4 3.4-6** Kl 1.26-27 **3:6**
3.6 Ka 3.14; 3.28-29;Ep 2.13-19

kinie sini xeika kireni kini xinuku kireni mupusiki sainuku. Kakinuku siko xokupae Kristusu Yesusu xosa Xoiteue xokupa sapi akituworisikayai tirounuku.

⁷ Yei mua asinaku kuna uteiwopineure Xoiteue kakati ye saina apu saitiai. Nue ye xouweina xoukemu sierina, nue sokisokiyati pa saina tepineure, nupo sokisoki ye sietai.

⁸ Ye paiya Xoiteupo kireu xuiapu irueni kutu purinena pana, nue ye xouweina xoukemu sierina pa saina sietai, paiya xetau xeteneai apimi xosa kuna uteiwopineure. Mua asinaku kuna paiya, asinaku sapi nikau, paiya Kristusu taiwoteneai xuiapue tepineri. Mua xokupa sapi paiya sini apue uteinuku ninaxepu sie xuwe.

⁹ Xoiteue xokupa sapi iyarina, ximuximuni nukoe kapia kakepurexeyai nanunanu ximiakereyai. Kakati ekime pa nanunanu sipesi ximiaki purotai. Pana muaia yei nupo nanunanu yarani uteiwopineure saina sietai.

¹⁰ Ekime ximiakereyaina pana, muaia nukoe kakati nukoure xonikisuwoteneai xuiapu putawori, pa kapiarei nupo xokupa xokupa asinaku nanunanu xeika sipa xeika yaraxeri, mena xouropu sokisoki yaniyani xeika tumu xeikae Xoiteupo nanunanu sipawopineri.

¹¹ Ekimeni Xoiteue mua saina kakepure nanuwoyai xati, ximine sikou Kokaipa Kristusu Yesupopo sainae saina tietai.

3:7 3.7 Kl 1.23-25 **3:8 3.8 1** Ko 15.9-10;Ka 1.16;Ep 1.7;Kl 1.27;1 Ti 1.13-15 **3:9 3.9** Ro 16.25;1 Ko 2.7;Ep 1.9;Kl 1.16; 1.20;Ip 1.2
3:10 3.10 Ro 8.38; 11.33;Ep 1.21;1 Pi 1.12

¹² Kakati sini Kristusue xosikisunuku, sini ximikiroukirixe. Sini xiri sipa, Kristusu nu Xoiteu xosa putawopu ime.

¹³ Pa xati ye ximine tini katikine, tini tianitikepure mua tatau xemetiaire xekepi nanunanuware, tinipo xotikisu oro koxete. Xuwe. Mua sapi yaraxetaire tini nimaririwa, pa amure, tini Xoiteu xeika ati purakuaire tianitikepina.

Epeseie sokisoki puropinerire Polue kunikuni-wotai

¹⁴ Xauwae kakeyai kapiaure nanune nure xoitapa ukurouroune.

¹⁵ Nue xokupa kini mena xouro puroto ouro purotowoteneai nikau Eminiki xati, nukoini nini xokupa weniniketai.

¹⁶ Yei xoitapa ukuroune ipaki kunikunine, Xauwae tini asinaku asinaku sapini kutu tikepure akituworitiketai, pa xati nukou Supo Youya tinipo xotikiro koratia tini xiri sokisokini kutu purakuai xiroune.

¹⁷ Tinipo xotikisue kakatia Kristusue tinipo xotikiro puropina. Kakatia kireu xiri xonikiewopi kapia paie, tinipo xotikikemu tuporo xiri sokisokina paiya ouwe na poru soki tati nae soki tumurouna sie kakatia tini sokisoki tumuwakuai.

¹⁸⁻¹⁹ Pa xati tinie Xoiteupo xuiapu xeika sokisoki takuai, kakinari Kristusue kireu xiri

3:12 3.12 Yo 14.6; Ro 5.2; Ep 2.18; Ip 4.16 **3:13 3.13** Kl 1.24 **3:15 3.15** Ep 1.10; Pl 2.9-11 **3:16 3.16** Ro 9.23; 2 Ko 4.16; Pl 4.19; Kl 1.11; 1.27 **3:17 3.17** Yo 14.23; Ep 2.22; Kl 1.23; 2.7 **3:18-19 3.18-19** Yo 1.16; Ro 10.3; 10.11-12; Ep 1.18; 1.23; Kl 2.2; 2.9-10

xouwenikepi kapia paiya, xiri kokaipani kutu xati, tini xokupae atinari sipawakuai, paiya pani xuwau xouna, xouroni kutu xouna, taipa toupaini xouna. Iyo, Kristusue kireu xouwenikepi kapia paiya xokupa sipa xiri emeserinikinana pana, tini nu xiri sipawakuai. Kakinaria xokupa asinaku sapi Xoiteu nuko xosauni koxetai paiya, tini xosa rania koxepineri.

²⁰ Xoiteupo sokisokieni sikou xosikiro saina tirouna xati, pa sokisokie sikou nanunanu xiri emeserina. Xoiteue xokupa sapi kakepinaure kotourounukua, nini Xoiteupo sokisoki sieni kutu xepuworixe.

²¹ Pa xati Yesusure xonikisuwoteneai xuiapue, sipesi sipesi Kristusu Yesusupo wenumurei Xoiteupo wenumu xokupa yause rania xourorepineri. Pa sua.

Sini Kristusupo mupokemu purinuku sini Xoiteu nukou kapiani taiwopu

4

4—6

Sini Yesusure xosikisukiriai apimi xosiki tu-maxi puropu

¹ Ye Polu ye kakauya xosa purine, pa amure, ye Kokaipapu saina tiroune. Xoiteue nukoni kutu taiwakuaire yaitikeyaire ye nanune, pa xati

3:20 3.20 Ro 16.25;1 Ko 2.9;Kl 1.29 **3:21 3.21** Ro 11.36; 16.27;Ip 13.21 **4:1 4.1** Ep 3.1;Pl 1.27;Kl 1.10;1 Ts 2.12;Pm 1; 9

nukoe xouwewotai asinaku kapiarei texakuaire xakumetikepurexine.

² Kireu apimi nini Yesusure xonikisuwoteneai irueni kutu tini purinari, asinaku kapia nini xosa kaka. Tini xosa kapia xoreiyereri kakixanari nini xosa kisamairatikexete. Tini kireni kiren timeripoti xotikikemu nini tinikinari ninie tini tiketeneai xu xemeroa.

³ Xoiteupo Supo Youyae xosikikemu kiren timeripoti tumaxi purupu kapia sikati, pa kapiae muri sie taisikerati kireni kinipuere sini purinuku. Pa xati tini pa kapia soki tepure sokisokixa.

⁴ Mupusiki kireni tuku, Xoiteupo Supo Youya kireni tuku. Panumu sie tini kireni sapi kireni yakuwakuaire Xoiteue yaitikina, paiya Xoiteue siko xosa kakepurexetai asinaku sapi xousokuwopina.

⁵ Kireni Kokaipa kireni purina, xosikisuwopi kapia kireni, Xoiteupo wenumurei ene isepi kireni.

⁶ Kireni Xoiteu tuku, nu siko xokupa sikau Emisiki. Nue xokupa xuiapu oronikina, nue xokupa xuiapu xopuro saina tina, xokupa xuiapu xosa purina.

⁷ Kristusue kokaipa sokisoki xeika sipa xeika siko siketai xati, panumu sieni Xoiteue siko xokupa kireni kireni xouwesikina xoukemu siketai.

⁸ Xoiteupo nakaue ipaki kunauna,

4:2 4.2 YT 20.19;Ka 5.22-23;Kl 3.12-13 **4:3 4.3** Kl 3.14-15 **4:4**
4.4 Ro 12.5;1 Ko 12.4; 12.11-12;Ep 1.18; 2.16-18 **4:5 4.5** Yo 10.16;1
 Ko 1.13;2 Ko 11.4;Ka 3.27-28;Ip 6.6 **4:6 4.6** Ro 11.36;1 Ko 12.6
4:7 4.7 Ro 12.3; 12.6;1 Ko 12.11 **4:8 4.8** Siri 68.18;Kl 2.15

“Nue xouroni kutu xouna,
 kokaipa kakauya apimi kini sonikati
 nuko xeika xowoteneai.
 Kakina sokisoki xeika sipa xeika
 apimi tiniketai,” xetai.

⁹ Mua kuna “nu xouro xowotai” paiya Kristus nu xouro kireni xowopu xuwexi atarisikina. Xuwe. Ximuximua nu ou toupai miniminikani kutu purotai xosa xowotai.

¹⁰ Pa apue ximuximu ou minika xowotaieni, xouro rania xowotai. Nue xokupa sapi inaina-wopure, xokupa mena xouroni kutu xowotai.

¹¹ Nue sore muanumu sokisoki xeika sipa xeika siketai. Kireu apimi xosa paiya Yesusupo tianu-tianuwopi saina tiniketai. Kireu apimi xosa paiya kunatureture saina tiniketai. Kireu xosa paiya xuiapu xosa asinaku kuna uteiwopineri saina tiniketai. Kireu xosa paiya yayakunikepi saina tinikete Xoiteue xouwewotai kapia xuiapu taitainikepineri saina tiniketewotai.

¹² Sini Xoiteupo xuiapue nukou asinaku saina tepuxati Kristusue sokisoki xeika sipa xeika tian-isikepure siketai. Pa xati Kristusupo mupokemu sokisoki xinapa ati puropina.

¹³ Mua sainae xowoki xowoki wati xosikisukiri paie kakatia, sini xiri xosikikemu tumaxi purinuku siko xokupani Xoiteupo Nono sipawopu. Kakinuku Yesusure xosikisunuku sokisokixinukua Kristus nuko sieni asinaku kapia tepu.

4:9 4.9 Yo 3.13 **4:10 4.10** Ip 4.14; 9.24 **4:11 4.11** Ro 12.7;1
 Ko 12.28;2 Ti 4.5 **4:12 4.12** 1 Ko 12.7;Ep 1.23;2 Ti 3.17 **4:13**
4.13 1 Ko 14.20;Kl 1.28; 2.2

¹⁴ Sini nono misiarara sie pani puropuxe, pa xakuxakutua nikau kuna paiya nini xoreix-epineri xokupa kapia xiri sipani kutu, paie kakati xupeu xeika xasi xeikae sini xosa sokau porourouna sie porosikepuwatixe, ousoe xasi ukauro kamariorio tiririkixanauna xowopurexetai wese xowopu xuweurouna sie xuwe.

¹⁵ Sini panumu kuna xosa xakusiki iyarepuxe. Xuwe. Sini kireu xiri xonikiewopi kapia tainuku nini xosa suau kuna kireni kunawopu. Kakinuku sokisoki xuiapu sainuku, siko tapusiki Kristusu xeika xiri lixepu,

¹⁶ nue kakati sikou mupusikipo xokupa xupusiki siasiki ekisiki paiya nukoe siko kireni kireni saina siketai xati asinaku saina tirounuku. Nue kakati siko xokupa xosikitapapu tunie xiri kiritinuku kireu xatasikimana xosikienikepi kapia tairouna, pa kapia paie kakati mupusiki kokaipaxina sokisokixirouna.

Yesusure xonikisuwoteneai xuiapu nini oma kapia xosa texepineri

¹⁷ Pa xati ye tini xosa kire kuna kunawopure xine. Kokaipapu wenumurei ye ipaki sokisoki kuna kunaune, tini xukumi nikau kapia xosa pani texaku. Ninipo nanunanu paiya turutaruwati,

¹⁸ ninipo sipa paiya ukumu sie xina. Nini sipa xiri xuwe xati, xonikikemu kitiere, pa xati nini Xoiteupo misepirei purorixe.

4:14 4.14 Ais 28.9;1 Ko 14.20;2 Ko 2.17;Ip 13.9 **4:15 4.15** Ep 1.22; 4.25;Kl 1.18;1 Yo 3.18 **4:16 4.16** Kl 2.19 **4:17 4.17** Ro 1.21;1 Pi 1.14 **4:18 4.18** YT 26.18;Ka 4.8;Ep 2.12;1 Ts 4.5

19 Nini xoxixoxi kapia kakerineri paire mayaxirouworixe. Nini ayaka kapia kamatupo xosa maneri, xoxixoxi kapia kakepure xonikemu sana.

20-21 Tini Kristusupo kuna iyesari, Yesusu xosa purotai suau kuna taitaitiketeneaxi nanune. Paina ye sipa, tinie pa xukumi nikau kapia xoxi kakakuaire taitaitikepu xuwe.

22 Tini rania ekime xipiki xotikikemupo kapia xosa texikiniai, paiya xoreiyeri xosiki saroati xoxi kapia kakepi xotapa, pa kapiae apu xoxixepina ime yatawotai. Pana ximine tini mua xipiki kapia kakepi xotapa xesauwari,

23 tinipo nanunanu oma xepina.

24 Tini oma xuiapu saya, paiya Xoiteu nukoini kakati oma xuiapu saineri Xoiteu nuko sieni purineri, pa amure, Xoiteu nuko ekero ninipo kapia paiya xiri teteiwoki xoseini kutu.

25 Pa xati tini xoreixepi kapia weta. Tini xokupae kireu xuiapu Yesusure xonikisuwoteneai xosa suau kuna kireni kunawa, pa amure, siko xokupa paiya kireni mupusikipo masa purinuku.

26 Tini kisamairatikatia, tini sosopa epixakuai. Panumu tini xunu eraku. Panumu tini kisamaira xosa purariporoni asau munoxete.

27 Panumu tini Satanipo isima taiyaku.

28 Petuae pani pexeni. Xuwe. Nini mua saina

4:19 4.19 Kl 3.5 4:22 4.22 Ro 6.6; 8.13; Ep 2.2-3; 4.17; Kl 3.9; Ip 12.1; 1 Pi 4.3 4:23 4.23 Ro 12.2; Kl 3.10 4:24 4.24 Stt 1.26; Ro 6.4; Ep 2.10; Kl 3.10 4:25 4.25 Sek 8.16; Ro 12.5; Kl 3.8-9 4:26 4.26 Siri 4.4; Ye 1.19-20 4:27 4.27 2 Ko 2.10-11; Ye 4.7; 1 Pi 5.9 4:28 4.28 1 Ts 4.11; 2 Ts 3.8; 3.11-12

ati tineri, xokupa sapi tineria, kireu apimi xuru xuweu puroteneai tianikepineri.

²⁹ Tini kakixanari xoxixoxi ninia tinipo suputikerei wetari koxete. Xuwe. Apimi irerewoteneai sokisokinikepure, asinaku kuna kireni kopina. Muanumu kuna paie kuna iyeseteneai apimi xosa Xoiteue xouwesikina xoukemu sikirouna kapia kopina.

³⁰ Tinie Xoiteupo Supo Youya kakixari xoukemu tutumuriwaku. Xoiteu nukou xuiapuni kutu purakuai yekutikina Xoiteupo Supo Youya tiketai, kakina xiyeri sotikati somoni kutu purakuai yause ataritikepurexina.

³¹ Tini xokupa xotikikemu xoxixoxixepi kapia wetinari, makawopi wetinari, kisamaira wetinari, xatiki kopuwopi wetinari, pire wetinari, xokupa kapia xoxi weta.

³² Tinie Yesusure xonikisuwoteneai xuiapu xotikikemu tinikinari nini xosa asinaku kapia kakinari, takitaki tianuwataxa. Xoiteue Kristus wenumurei tinipo xunu wetetai sie, tinie ninipo xunu wetakuai.

5

Sini memeremu xosauni kutu texepu

¹ Xoiteue tini xiri xouwetikirouna xati, tini nupo nono purinuku. Pa xati nukoe kakirouna kapiiani tini taiwa.

4:29 4.29 Ep 5.4; Kl 3.8; 3.16; 4.6; 1 Ts 5.11 **4:30 4.30** Ais 63.10; Ro 8.23; Ep 1.13-14; 1 Ts 5.19 **4:31 4.31** Kl 3.8; 3.18-19; Ta 3.2-3; 1 Pi 2.1 **4:32 4.32** Mt 6.14; 18.22-35; Mk 11.25; 2 Ko 2.10; Kl 3.13 **5:1 5.1** Mt 5.48; Lu 6.36

² Kristusue siko xiri xouwesikina tianisikepure nukou ekeomani siketai. Nue Xoiteu xosa xoui-wori asinaku xurituku sapie somu xuri pukau-rouna sie nukou ekeoma Xoiteu tuwotai. Pa xati tinie kireu xiri xoutikieninikepi kapiiani kuturei texa.

³ Tini kakixanari ayaka ayaka kapia kakinari xokupa xoxixoxi xunu kapia kakinari, kireu apimi nikau sapire ekitikie netewaku. Pa xoxixoxi kapiapu kuna rania tini xopuro xayaka xayaka moxete. Tinie panumu kapia kakinari ime taiyaria xuiapue tini kuna xosatiki suwopineri.

⁴ Tini kakixanari xunu kuna kunaunari nanana kuna kunaunari neraunari ninia kuna kunawaku. Sini panumu kapia xoxi kakepuxe. Xuwe. Xoiteu xosa kireni eiyase kuna kunawa.

⁵ Tini panumu atinari sipawa, ayaka kapia kakineri xunu kapia kakepineri xuiapu xeika ekinikie sapi nirouneri xuiapu xeika nini xorei xoiteu xosa muris tepi sie kapia kakineri, nini panumu xuiapu kinia nini Kristusuno Xoiteu-noe xuiapu yakunikepineri yause xosa manepu-worixe.

⁶ Tini sosopa epixa, apimie purutikeri pa xoxi kapia xona kakakuairi katikeri ninipo in-ainaropu aipu kuna xoxi taiwaku. Panumu kapia sore kakeri Xoiteue xasese maneteneai apimi xosa kisamairauna.

5:2 5.2 XT 29.18;XS 1.9;Siri 40.6;Yo 13.34;Ro 14.15;2 Ko 2.15;Ka 2.20;Ip 7.27; 10.10;1 Yo 3.11; 3.23 5:3 5.3 Ro 6.13;1 Ko 5.1;2 Ko 12.21;Kl 3.5;1 Ts 4.3 5:4 5.4 Mt 12.35;Ro 1.28;Ep 4.29 5:5 5.5 1 Ko 6.9-10;Ka 5.19-21;Kl 3.5 5:6 5.6 Ro 1.18;Kl 2.4; 2.8;2 Ts 2.3

⁷ Pa xati tini panumu apimi xeika kakixanari lixaku.

⁸ Tini ekime ukumu xosa purikiniai, pana muaia Kokaipae memeremu xosa iyaitikeretai. Pa xati tini memeremu xosaupo xuiapu sie xosa texa.

⁹ Memeremu paie xokupa asinaku kapia xeika kutu asinaku kapia xeika suau kunapu kapia xeika yararirouna.

¹⁰ Tini Kokaipae xouweuouna kapia sipawopure xaute sokisokixa.

¹¹ Tini ukumu xosaupo kapia kakirouneri apimi xeika lixaku. Panumu kapiiae asinaku xoye erirouwatixe. Xuwe. Xeuxana, tinie apimi panumu atarinikinari, muanumu kapia xoxi nika.

¹² Ninie ximiakineri kakirouneri kapiiare ye kunawopure xuwe. Ye panumu kapiiare kuna-wopinepa ye mayaxine.

¹³ Pana memeremue xokupa kapia xotapa yararatia yarani purirouneri.

¹⁴ Memeremue kakati kire sapi yarani puratia, pa sapi rania memeremu siexina. Pa xati mua kuna purina,

“Apu ne mua xinitiaia, ne sarouwo.

Ne kopa upurei saroaua

Kristusue ne memeremu
tinepina,” xetai.

5:8 5.8 Yo 12.36; Yt 26.18; Ro 1.21; 2 Ko 3.18; Ep 2.11-13; Kl 1.13; 1 Pi 2.9; 1 Yo 2.9 **5:9 5.9** Ka 5.22 **5:10 5.10** Ro 12.2; Pl 1.10; 1 Ts 5.21; 1 Ti 2.3 **5:11 5.11** Ro 6.21; 1 Ko 5.9-11; Ka 6.8; 2 Ts 3.6; 3.14; 2 Yo 10-11 **5:13 5.13** Yo 3.20-21; Ip 4.13 **5:14 5.14** Ais 26.19; 60.1; Ro 13.11

¹⁵ Pa xati tini sesepi texinaria tini sosopani epixakuai. Tini nanana xinari sipa xuweu apue teiyewaku. Xuwe. Tini sipa suku apue teiyewa.

¹⁶ Tini Xoiteupo kapia kakakuai yause muai. Pana sini mua yause xosa purikiriai paiya xoxi yause, pa xati sosopa xakuai, panumu mau yause aini xuwxete.

¹⁷ Tini kakixanari nanana kapia kakaku. Xuwe. Tini Xoiteue xouwewotai nanunanu atinari sipawakuai.

¹⁸ Tini kakixanari xisa ere ninari nanana xaku. Xuwe. Panumu kapias tini xoxirounuku. Tini Xoiteupo Youya wetari tini xosa koxepina.

¹⁹ TiniXoiteupo kireu xuiapu xeika kunaunari paiya, siri Siri Nakau xosa puroteneai kuna tete muris tepupo kireu siri tete, Xoiteupo Supo Youyae xotikiro saretai siri teteunari, tinipo kuna xosa iyara. Kakinari tinipo suputikirei xeika xotikirei xeika rania, tini Kokaipaure siri wawaiwa.

²⁰ Kakinari sikou Kokaipa Yesusu Kristusupo wenumurei, tini sipesi xokupa sapire Xauwa Xoiteu eiyasewa.

Polue xuiapue tiwataxeteneaire kunawotai

²¹ Tini Kristusu sinipo Kokaipaxi nanunari, tini kireni kirenje Xoiteupo kireu xuiapu irue pura.

²² Tini xuia, tini Kokaipa irue purikiriai sie takipo xamutikimana irue pura.

5:16 5.16 Ka 6.10;Kl 4.5 **5:17 5.17** Ro 12.2;Kl 1.9;1 Ts 4.3; 5.18
5:18 5.18 Asin 20.1;Ais 5.11; 5.22;Lu 21.34 **5:19 5.19** Siri 34.1;YT
 16.25;1 Ko 14.26 **5:19 5.19-20** Kl 3.16-17 **5:20 5.20** Siri 34.1;Ais
 63.7;Ip 13.15;1 Pi 2.5 **5:21 5.21** Pl 2.3;1 Pi 5.5 **5:22 5.22** Stt
 3.16;Ep 6.5;Kl 3.18;1 Pi 3.1

²³ Pa amure, Kristusue nukoure xonikisuwoteneai nikau tumu sie, apue nupo xui tapaxina. Yesusure xonikisuwoteneai Kristusupo mupokemu xati, Kristusue xiyeri sowotai.

²⁴ Yesusure xonikisuwoteneai Kristusu irue purineri. Panumu sie tini xui rania, xokupa yause tinipo xamutikimana irue pura.

²⁵ Kristusue nukoure xonisuwoteneai tianikepure xiri xouwenikina nupo ekeoma wetetai sie, tini apue rania tinipo xui xiri xotikienika.

²⁶ Nukou ene xeika kuna xeika xosa Kristusue nikoure xonikisuwoteneai ene iserinikati nupo ekero asinaku teteiwoteneai. Panumu kapiæ nukoe Yesusure xonikisuwoteneai ikou xetai.

²⁷ Nukoe nukou ekeroni kutu Yesusure xonikisuwoteneai xuiapu atinikati xiri xoseiyeri, panumu xunu xeika kesi xeika tukuxepuwatixe. Xuwe. Yesusure xonikisuwoteneai paiya xu xuweu xeseu puropineri.

²⁸ Panumu sie tini apu tini takipo muputikini xotikieukiriai sie, tini takipo xuimi xotikienika. Apue nukou xui xiri xouwewotai paiya, nu nukoini nuko xiri xouweuna.

²⁹ Siko sipa, kire apue nukou mupokemuni xiwairouwatixe. Xuwe. Nu xoye tuna ati yakurouna. Kristusue nukoure xonikisuwoteneai xuiapu yakunikirouna sie,

³⁰ pa amure, siko paiya Kristusupo mupokemupo siau xeika xupo xeika ekekemu

5:23 5.23 1 Ko 11.3;Ep 1.22-23;Kl 1.18 **5:25 5.25** Ka 1.4;Kl 3.19;1 Pi 3.7 **5:26 5.26** Yo 15.3; 17.17;Ta 3.5;Ip 10.10; 10.22;1 Yo 5.6
5:27 5.27 2 Ko 11.2;Ep 1.4;Kl 1.22 **5:30 5.30** Ro 12.5;1 Ko 6.15; 12.27;Ep 1.22-23

xeika sie.

³¹ Xoiteupo nakaue ipaki kunauna, “Pa xati apue omo ana wetina nupo xui xeika lixirouna, kakina nini kireni mupuniki sairouneri,” xetai.

³² Mua ximiaropu kuna paiya nu kokaipa nanunanu tuku. Ye ikoni nanune, paiya Kristus xeika nukoure xonikisuwoteneai xuiapu xeikaure kunaunaxine.

³³ Pana mua kunae rania kunauna tini apu kireni kirenienie takire xirounuku sieni tinipo xui xiri xotikienika. Xui paiya nupo xamu irue purina ati yakuwopina.

6

Polue nono xeika eminikimana aninikimana xeikaure kunawotai

¹ Tini nonomi, Xoiteue xouweiwotai kapia tinie emitikimana xeika anitikimana xeika nikau kunnani kutu taiwa. Tini panumu kapia kakinaria, tini asinaku kapia kakinuku.

² Xoiteupo nakaue ipaki kunauna, “Ne emini-aninipo kuna tainau nini irue puro,” xetai. Mua tuxotapa paiya akereki tuxotapa sokisoki kuna xeika purina,

³ paiya sokisoki kunae ipaki kunauna, “Ne panumu kakinaua, xokupa saina sie kakitiai asinaku xatia, ne mua ouro xuwau yause purowai,” xetai.

5:31 5.31 Stt 2.24;Mt 19.5;Mk 10.7-8;1 Ko 6.16 **5:32 5.32-33** Kl 3.19;1 Pi 3.6;XKY 19.7 **6:1 6.1** Asin 23.22;Kl 3.20 **6:2 6.2** Mt 15.4 **6:2 6.2-3** XT 20.12;Tu 5.16

⁴ Tini eminikimana, tini kakixanari niretiki-mana nikau nanunanu xoxixoxiwaku. Panumu nini kisamairanikexete. Xuwe. Tini Kokaipa ekero asinaku kapia kakinari, tinipo nono atinari kutunikinari Xoiteupo kuna xosa taitainika.

Polue saina apu xeika tumu xeikaure kuna-wotai

⁵ Tini aipu saina xuimiapimi, tinie tinipo saina yayaku kokaipaure nanunari ninipo kuna taiwa. Tini kakixanari xoreire pa kapia kakaku. Xuwe. Tini Kristusupo kuna iyesinuku tairounuku sieni ninipo kuna xiri taiwakuai.

⁶ Ninie tini nutietiki purori ai niraniranikinari ekiniki tepure nanuworu asinaku saina taku. Pa xuwe. Tinie ipaki nanunaria sini Kristusupo aipu saina apuni purinukuxinari, Xoiteupo nanunanu taiwopure xotikikemu nimaririwa.

⁷ Pa xati tini xotikikemu nimaririrei saina ta. Tini apu nikau saina tarixe. Xuwe. Tini Kokaipa nukou sainani tinuku.

⁸ Tini nanuwa. Kire apu nu aipu saina apure e nu somo purotaie asinaku saina tatia, Kokaipae nu asinaku xe tuwopina.

⁹ Tini saina yayuku teu, tinie rania tinipo aipu saina apimi xosa asinaku kapia kaka. Tinie nini ximikepineri kapia kakaku. Mena xouro purotai Kokaipa paiya nu tinipo Kokaipa nini rania ninipo Kokaipa, nu kireni kapiareini xokupa xuiapu nikau kapia uteirouna.

6:4 6.4 Tu 4.9; 6.7; 6.20-25; Siri 78.4; Asin 19.18; 22.6; Kl 3.21 **6:5**
6.5 2 Ko 7.15; Pl 2.12; Ta 2.9-10; 1 Pi 2.18 **6:5** 6.5-8 Kl 3.22-25 **6:8**
6.8 2 Ko 5.10; Ka 3.28; Kl 3.11 **6:9** 6.9 Tu 10.17; Ro 2.11; Kl 3.25;
 4.1

Yesusure xonikisuwoteneai xuiapue xomatua sie purineri

¹⁰ Paina muaia yeu kuna ipaki xuweiyepure xine, tini Kokaipa xeika lixikiriai, pa xati tini nupo xokupa kokaipa sokisokire nanunari tini sokisoki tumuwa.

¹¹ Tini Xoiteue xokupa xomapu nekei sikirouna nekei nekeiyerinari, sokisoki tumunaria Satanie ximiakina kahirouna xokupa xoreixorei kapia sokau porowakuai.

¹² Atinari nanuwa, sini xuiapu xeika waraxiroukirixe. Xuwe. Sini xokupa tumu teu xouro puroteneai xeika, kokaipa weniniki tuku yaniyani xeika, xokupa sapi sokisoki xeika waraxinuku, ninie ukumupo yause xosa ou yakurouneri. Pa xeika xokupa sokisoki xoxixoxi yaniyani xouro puroteneai xeika rania sini waraxinuku.

¹³ Pa xati tini Xoiteue xokupa xuiapu xoma xakuai nekei tikirouna tinari xoxi yause xosa tini sokisoki tumunari xoma xakuai. Kakinari xoma xuwxatia, tini sokisoki tumunaria purakuai.

¹⁴ Tini sokisoki tumuwopurexinari paiya suau kuna tinipo kikai sie takerinari, kutu asinaku kapias marimasa sokisoki sie tototikiro ererari xotorepina,

¹⁵ kakinari Xoiteupo xuiapu xonikikemu tumaxepurexetaire asinaku kuna uteinari ireinaria, tinipo erieri sie pa kapia erera.

6:10 6.10 1 Ko 16.13;Ep 1.19; 3.16;Kl 1.11 **6:11 6.11** Ro 13.12;2 Ko 6.7; 10.4;Ep 4.14;1 Ts 5.8 **6:12 6.12** Yo 12.31; 14.30;Ro 8.38;1 Ko 15.50;Kl 2.15;1 Pi 5.8-9 **6:13 6.13** 2 Ko 10.4;Ep 5.16 **6:14 6.14** Ais 11.5; 59.17;2 Ko 6.7;1 Ts 5.8 **6:15 6.15** Ais 40.9; 52.7;Na 1.15;Ro 10.15

¹⁶ Tini pa xokupa xomaxakuai sapi tinari, xotik-isuwopi kapia rania, kupira masa sie sokisoki tinari paiya, pa apu xoxi Satanie xokupa xepi xori piti xati tini xosa kourouna xukuwakuai.

¹⁷ Tini Xoiteue xiyeri titiketaire nanunanuwari, pa nanunanue koike kapa kuroreki sie xepina. Kakinari Xoiteupo Supo Youyapu saripipiri nu Xoiteupo kuna takuai.

¹⁸ Tini sipesi Xoiteupo Supo Youyapu sok-isokirei kunikuniwa. Kakinari Xoiteue tianitikepinaure nu kotounari xonuxonu kunikuni kunikuniwa. Tini sipesi sosopa epinari tini panumu kapia wetakuaixe. Tini kakixanari arikaku. Xoiteue nupo xokupa xuiapu tianikepinaure tini sipesi kunikuninari Xoiteu kotowakuai.

¹⁹ Kakinari ye rania Xoiteu kotounari taniya. Tini panumu kakinari kunikuniwaria, Xoiteue yeu supiro kuna iyaratia ye ximikepi wetinei asinaku kunapu ximiaropu kuna xiri uteiwopine.

²⁰ Yei mua asinaku kuna uteiwopineure Xoiteu nukoini xesayati xoutiai xati, ye pa xotapaure kakauya xosa purine. Ye kuna uteiwopine saina tuku, pa xati tinie Xoiteu xosa kunikuniwari ye sokisoki yatia ximikepi wetinei xuiapu xosa sokisoki kunawopine.

Nini tianikepinaure Polue Xoiteu kotowotai

6:16 6.16 1 Yo 5.4 **6:17 6.17** Ais 49.2; 59.17; 1 Ts 5.8; Ip 4.12; XKY 19.15 **6:18 6.18** Mt 26.41; Lu 18.1; Ro 12.12; Kl 4.2; 1 Ts 5.17; 1 Ti 2.1 **6:19 6.19** YT 4.29; 2 Ko 3.12; Kl 4.3-4; 2 Ts 3.1 **6:20 6.20** 2 Ko 5.20; Pl 1.20; Pm 9-10

²¹ Yei xokupa saina titiaire Tikikusie tini xakumetikepina. Tikikusi nu sikou xatasikini kutu, nu Kokaipapu asinaku saina apuni kutu.

²² Sinipo puropi purikiriai tini sipawakuaire, yei tini xosa nu xesauti utuna, nu utuna paiya tinipo xotikikemu sokisokiwopina.

²³ Xoiteu Emisiki xeika Kokaipa Yesusu Kristus xeikae tini xatasikimana tikau xotikikemu yorowatia kuruwopina, nue kakatia tini sokisoki xotikisunaria kireu apimi xotikienikakuai.

²⁴ Xokupa apue sikou Kokaipa Yesusu Kristus xiri xonikiewopi kapia wetepu xuweurouneri paiya, Xoiteue nini xosa xouwenikina xousuax-epi kapia kakepina.

Xoiteupo Kuna
New Testament in Somau Garia
Nupela Testamen long tokples Somau Garia long
Nuigini

copyright © 2024 Pioneer Bible Translators

Language: Somau Karia

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

56ccf306-a353-5c26-b943-551207f76acc